

საქართველოს კანონი

უცხოელთა სამართლებრივი მდგომარეობის შესახებ

თავი I ზოგადი დებულებები

მუხლი 1. უცხოელი მოქალაქეები

- საქართველოში უცხოელებად ითვლებიან:
 - პირები, რომლებიც არ არიან საქართველოს მოქალაქეები და აქვთ სხვა სახელმწიფოს მოქალაქეობის დამადასტურებელი საბუთი (უცხო სახელმწიფოს მოქალაქენი);
 - მოქალაქეობის არმქონე პირები, რომელთაც აქვთ უცხო სახელმწიფოში მუდმივად ცხოვრების დამადასტურებელი შესაბამისი დოკუმენტი (უცხო სახელმწიფოში მუდმივად მცხოვრები მოქალაქეობის არმქონე პირი).
- საქართველოში უცხოელებს გარანტირებული აქვთ საქართველოს კანონმდებლობით გათვალისწინებული უფლებები და თავისუფლებები.
საქართველოს 1997 წლის 28 ოქტომბრის კანონი №9 95 - I ს-პარლამენტის უწყებანი, №4 5, 2 1.11.1997წ., გვ. 23

მუხლი 2. უცხოელთა სამართლებრივი მდგომარეობის კანონმდებლობა

საქართველოში უცხოელთა სამართლებრივი მდგომარეობა განისაზღვრება კონსტიტუციით, ამ კანონით და საქართველოს სხვა საკანონმდებლო აქტებით, აგრეთვე საქართველოს საერთაშორისო ხელშეკრულებებით და ადამიანის უფლებათა დაცვის საყოველთაოდ აღიარებული საერთაშორისო სამართლებრივი ნორმებით.

მუხლი 3. უცხოელთა სამართლებრივი მდგომარეობის ძირითადი პრინციპები საქართველოში

- უცხოელებს საქართველოში ისეთივე უფლებები და თავისუფლებები აქვთ და ისეთივე მოვალეობები აკისრიათ, როგორც საქართველოს მოქალაქეებს, თუ საქართველოს მოქმედი კანონმდებლობით სხვა რამ არ არის გათვალისწინებული.
- უცხოელები საქართველოში თანასწორნი არიან კანონის წინაშე წარმოშობის, სოციალური და ქონებრივი მდგომარეობის, რასის, ეროვნული კუთვნილების, სქესის, განათლების, ენის, რელიგიის, პოლიტიკური თუ სხვა შეხედულებების, საქმიანობის სფეროს და სხვა გარემოებათა მიუხედავად.
- საქართველო იცავს თავის ტერიტორიაზე მყოფ უცხოელთა სიცოცხლეს, პირად ხელშეუხებლობას, უფლებებსა და თავისუფლებებს.
- საქართველო თავის მოქალაქეთა თანაბრად იცავს თავის ფარგლებს გარეთ დროებით მყოფ იმ მოქალაქეობის არმქონე პირთა უფლებებსა და კანონიერ ინტერესებს, რომლებიც მუდმივად ცხოვრობენ საქართველოში.
- საქართველოში უცხოელთა უფლება-მოვალეობების აღსრულება არ უნდა ლახავდეს საქართველოს სახელმწიფო ინტერესებს, არ უნდა ზღუდავდეს საქართველოს მოქალაქეთა და სხვა პირთა უფლებებს და უფულებელყოფდეს მათს კანონიერ ინტერესებს.
- იმ სახელმწიფოების მოქალაქეთა მიმართ, სადაც საქართველოს მოქალაქეთა უფლებები და თავისუფლებები განზრახ შეიზღუდება, საქართველო აწესებს ადეკვატურ შეზღუდვებს.

მუხლი 4. უცხოელთა მოვალეობა დაიცვან საქართველოს კონსტიტუცია და საქართველოს კანონები

საქართველოში მყოფი უცხოელები ვალდებული არიან დაიცვან საქართველოს კონსტიტუცია და საქართველოს კანონები, პატივი სცენ ქართულ ენას, ქართველი ერის კულტურას, ტრადიციებს და წეს-ჩვეულებებს, საქართველოში მცხოვრებ ეროვნულ უმცირესობათა უფლებებსა და თავისუფლებებს.

მუხლი 5. საქართველოში მუდმივად მცხოვრები და დროებით მყოფი უცხოელები

- უცხოელებს შეუძლიათ მუდმივად იცხოვრონ საქართველოში საქართველოს კანონმდებლობით დადგენილი წესით გაცემული მუდმივად ცხოვრების ნებართვისა და პირადობის დამადასტურებელი მოწმობის საფუძველზე.
- საქართველოში მუდმივად ცხოვრების ნებართვა შეიძლება გაიცეს, თუ უცხოელი:
 - წარმოშობით ქართველია;
 - საქართველოს მოქალაქის მშობელი, მეუღლე, 18 წლამდე ასაკის ან სრულწლოვანი არაქმედუნარიანი შვილია;
 - საქართველოში მცხოვრები იმიგრანტის მშობელი, მეუღლე, 18 წლამდე ასაკის ან სრულწლოვანი არაქმედუნარიანი შვილია;
 - საქართველოს მოქალაქის მეურვეობაში ან მზრუნველობაში მყოფი პირია;
 - საქართველოს მოქალაქის მეურვე ან მზრუნველია;



აგრეთვე იმ შემთხვევებში; თუ

ვ) საქართველოში იმყოფება საქართველოს სახელმწიფო ინტერესების შესაბამისად;

ზ) აკმაყოფილებს საქართველოს კანონმდებლობით გათვალისწინებულ სხვა მოთხოვნებს.

3. ამ მუხლის მე-2 ნაწილით გათვალისწინებული პირობები არ გამოიყენება იმ პირთა მიმართ, რომლებმაც უარი განაცხადეს საქართველოს მოქალაქეობის მიღებაზე „საქართველოს მოქალაქეობის შესახებ“ საქართველოს კანონის მე-3 მუხლის „ა“ პუნქტის შესაბამისად. ეს პირები ჩაითვლებიან საქართველოში მუდმივად მცხოვრებ მოქალაქეობის არმქონე პირებად.

4. უცხოელები, რომლებიც საქართველოში იმყოფებიან სხვა კანონიერ საფუძველზე 3 თვეზე მეტი ვადით, ითვლებიან საქართველოში დროებით მყოფებად და ვალდებული არიან დადგენილი წესით საქართველოს იუსტიციის სამინისტროს მმართველობის სფეროში შემავალი საჯარო სამართლის იურიდიული პირის – სამოქალაქო რეესტრის სააგენტოს ტერიტორიულ სამსახურში რეგისტრაციაში გაატარონ თავიანთი მოქმედი უცხოური პასპორტები ან მათი შემცვლელი დოკუმენტები და ქვეყანაში მათი ყოფნის ვადის ამოწურვისას გაემგზავრონ საქართველოდან.

საქართველოს 1997 წლის 16 ოქტომბრის კანონი №928- I ს-პარლამენტის უწყებანი, №44, 11.11.1997წ., გვ.15

საქართველოს 2004 წლის 24 ივნისის კანონი №189-რს - სსმ I, №19, 15.07.2004 წ., მუხ.73

საქართველოს 2005 წლის 28 დეკემბრის კანონი №2631-რს- სსმ I, №3, 16.01.2006წ., მუხ.25

მუხლი 6. თავშესაფრის მიცემა

1. საქართველო თავშესაფარს აძლევს იმ უცხოელებს, რომლებიც თავის ქვეყანაში იდევნებიან ადამიანის უფლებათა და მშვიდობის დაცვისათვის, პროგრესული საზოგადოებრივ-პოლიტიკური, მეცნიერული და სხვა შემოქმედებითი მოღვაწეობისათვის.

2. არ შეიძლება თავშესაფრის მიცემა იმ უცხოელებისათვის, რომელთა შეხედულებები და საქმიანობა ეწინააღმდეგება გაერთიანებული ერების ორგანიზაციის ამოცანებს და პრინციპებს და საქართველოს სახელმწიფო ინტერესებს.

3. უცხოელებისთვის თავშესაფრის მიცემის შესახებ გადაწყვეტილებას იღებს საქართველოს პრეზიდენტი.

საქართველოს 1997 წლის 16 ოქტომბრის კანონი №928- I ს-პარლამენტის უწყებანი, №44, 11.11.1997წ., გვ.15

თავი II

საქართველოში მყოფ უცხოელთა ძირითადი უფლებები, თავისუფლებები და მოვალებები

მუხლი 7. შრომითი საქმიანობის უფლება

1. საქართველოში მუდმივად მცხოვრებ უცხოელებს შეუძლიათ დაიკავონ ნებისმიერი თანამდებობა ან ხელი მიჰყონ ნებისმიერ შრომით საქმიანობას, რომელიც არ იკრძალება საქართველოს კანონმდებლობით, გარდა იმ თანამდებობებისა და საქმიანობისა, რომლისთვისაც კანონმდებლობის შესაბამისად აუცილებელია საქართველოს მოქალაქეობა.

2. საქართველოში დროებით მყოფ უცხოელებს ასევე შეუძლიათ დაიკავონ ნებისმიერი თანამდებობა ან ხელი მიჰყონ ნებისმიერ შრომით საქმიანობას, თუ ეს შეესაბამება საქართველოში მათი ყოფნის მიზნებს, ან თუ ასეთი რამ უშუალოდ არის გათვალისწინებული საქართველოს კანონმდებლობით.

მუხლი 8. დასვენების უფლება

საქართველოში მყოფ უცხოელებს აქვთ დასვენებისა და თავისუფალი დროის გამოყენების უფლება საქართველოს მოქალაქეებთან თანაბარ საფუძველზე.

მუხლი 9. ჯანმრთელობის დაცვის უფლება

საქართველოში მყოფ უცხოელებს აქვთ ჯანმრთელობის დაცვის უფლება საქართველოს კანონმდებლობისა და საქართველოს საერთაშორისო ხელშეკრულების შესაბამისად.

მუხლი 10. სოციალური უზრუნველყოფის უფლება

1. საქართველოში მუდმივად მცხოვრებ უცხოელებს აქვთ დახმარების, პენსიის და სხვაგვარი სოციალური უზრუნველყოფის უფლება თანაბრად საქართველოს მოქალაქეებისა.

2. საქართველოში დროებით მყოფი უცხოელი მოქალაქეებისა და მოქალაქეობის არმქონე პირების სოციალური უზრუნველყოფის საკითხი წყდება საქართველოს მოქმედი კანონმდებლობისა და საერთაშორისო ხელშეკრულებების შესაბამისად.

მუხლი 11. ქონებრივი და პირადი არაქონებრივი უფლებები

უცხოელებს საქართველოში შეუძლიათ ქონება ჰქონდეთ პირად საკუთრებაში, მემკვიდრეობით მიიღონ ან ანდერძით დატოვონ ქონება, ჰქონდეთ სამეცნიერო ნაშრომის, ლიტერატურისა და ხელოვნების ნაწარმოების, აღმოჩენის, გამოგონების, სამრეწველო ნიმუშების ავტორობის უფლება, აგრეთვე სხვა ქონებრივი და არაქონებრივი უფლებანი, თუ საქართველოს კანონმდებლობით სხვა რამ არ არის გათვალისწინებული.



მუხლი 12. განათლების მიღების უფლება

უცხოელებს საქართველოში აქვთ განათლების მიღების უფლება თანაბრად საქართველოს მოქალაქეებისა, საქართველოს კანონმდებლობით დადგენილი წესის შესაბამისად.

მუხლი 13. კულტურული ღირებულებებით სარგებლობის უფლება

1. უცხოელებს საქართველოში აქვთ კულტურული ღირებულებებით სარგებლობის უფლება თანაბრად საქართველოს მოქალაქეებისა.

2. უცხოელებს საქართველოში გარანტირებული აქვთ მშობლიური ენით სარგებლობის, ეროვნული კულტურისა და ტრადიციების დაცვისა და განვითარების უფლება, თუ ეს ზიანს არ მიაყენებს საქართველოს სახელმწიფოებრივ და მასში მცხოვრებ პირთა კანონიერ ინტერესებსა და უფლებებს.

3. უცხოელები ვალდებული არიან გაუფრთხილდნენ საქართველოს ისტორიისა და კულტურის ძეგლებს და სხვა კულტურულ ღირებულებებს.

მუხლი 14. პოლიტიკურ და საზოგადოებრივ გაერთიანებებში მონაწილეობის უფლება

1. უცხოელებს საქართველოში ეკრძალებათ საქართველოს ტერიტორიაზე მოქმედ პოლიტიკურ გაერთიანებებში გაწევრიანება, მათ საქმიანობაში მონაწილეობა, პოლიტიკური გაერთიანებების დაფუძნება.

2. უცხოელებს საქართველოში უფლება აქვთ საქართველოს მოქალაქეების თანაბრად დააფუძნონ საზოგადოებრივი გაერთიანებები, გახდნენ პროფესიული კავშირების, კოოპერაციული ორგანიზაციების, სამეცნიერო, კულტურული, სპორტული საზოგადოებების და სხვა საზოგადოებრივი ორგანიზაციების წევრები, თუ ეს არ ეწინააღმდეგება ამ ორგანიზაციების წესდებებს და საქართველოს კანონმდებლობას.

მუხლი 15. სარწმუნოების თავისუფლება

1. უცხოელებს საქართველოში, თანაბრად საქართველოს მოქალაქეებისა, გარანტირებული აქვთ აზროვნების, შეხედულებების და სარწმუნოების თავისუფლება.

2. აკრძალულია მტრობისა და შუღლის გაღვივება სხვადასხვა სარწმუნოების მიმდევართა შორის, ასევე პიროვნების დევნა პოლიტიკური თუ სხვა შეხედულებებისთვის.

მუხლი 16. საქორწინო და საოჯახო ურთიერთობანი

1. უცხოელებს საქართველოში შეუძლიათ დაქორწინდნენ და განქორწინდნენ საქართველოს მოქალაქეებთან და სხვა პირებთან საქართველოს კანონმდებლობის შესაბამისად.

2. საქართველოში მყოფი უცხოელები საქორწინო და საოჯახო ურთიერთობაში სარგებლობენ უფლებებით და აკისრიათ მოვალეობანი თანაბრად საქართველოს მოქალაქეებისა.

მუხლი 17. უცხოელთა პიროვნების დაცვის და მათ ცხოვრებაში ჩაურევლობის გარანტია

1. უცხოელებს საქართველოში საქართველოს კანონმდებლობით გარანტირებული აქვთ პიროვნების და საცხოვრებელი ადგილის ხელშეუხებლობა, პირად და ოჯახურ ცხოვრებაში ჩაურევლობა, ღირსებისა და რეპუტაციის პატივისცემა, კორესპონდენციის საიდუმლოების, ეკონომიკურ, სოციალურ და კულტურულ სფეროებში პიროვნების თავისუფალი განვითარების უფლება და სხვა უფლებები.

2. არ შეიძლება საქართველოში მყოფი უცხოელის დაკავება ან დაპატიმრება, გარდა იმ შემთხვევებისა, როდესაც:

ა) ცდილობდა უკანონოდ გადაელახა საქართველოს სახელმწიფო საზღვარი;

ბ) უკანონოდ იმყოფება საქართველოში;

გ) ჩაიდინა დანაშაული ან სხვა სამართალდარღვევა, რისთვისაც საქართველოს კანონმდებლობის თანახმად შეიძლება პიროვნების დაკავება ან დაპატიმრება;

დ) მის მიმართ სასამართლოს მიერ გამოტანილია გამამტყუნებელი განაჩენი და სასჯელის სახით შეფარდებული აქვს თავისუფლების აღკვეთა, ან როდესაც იგი გაქცეულია თავისუფლების აღკვეთის ადგილიდან და თავს არიდებს სასჯელის მოხდას;

ე) საქართველოს კანონმდებლობით გათვალისწინებულ სხვა შემთხვევებში.

3. უცხოელის დაკავების შემთხვევაში მისთვის გასაგებ ენაზე დაუყოვნებლივ უნდა ეცნობოს დაკავების მიზეზები და წარდგენილი ბრალდება, ამავე დროს განემარტოს საპროცესო უფლება-მოვალეობანი.

4. უცხოელი მოქალაქის დაკავების ან დაპატიმრების შემთხვევაში პროკურატურის ორგანოებმა 48 საათის განმავლობაში უნდა აცნობონ ეს საქართველოში იმ სახელმწიფოს დიპლომატიურ ან საკონსულო წარმომადგენლობას, რომლის მოქალაქეც არის დაკავებული ან დაპატიმრებული პირი. საქართველოში დროებით მყოფი მოქალაქეობის არმქონე პირის დაკავების ან დაპატიმრების შემთხვევაში კი საქართველოში იმ სახელმწიფოს დიპლომატიურ ან საკონსულო წარმომადგენლობას, სადაც მუდმივად ცხოვრობს დაკავებული ან დაპატიმრებული პირი.

მუხლი 18. საქართველოს ტერიტორიაზე უცხოელთა მიმოსვლისა და საცხოვრებელი ადგილის არჩევის უფლება

უცხოელები საქართველოს კანონმდებლობით დადგენილი წესის შესაბამისად სარგებლობენ საქართველოს ტერიტორიაზე თავისუფალი მიმოსვლისა და საცხოვრებელი ადგილის არჩევის უფლებით. უცხოელთა



მიმოსვლა და მათ მიერ საცხოვრებელი ადგილის არჩევა საქართველოში შეიძლება შეიზღუდოს, როცა ეს აუცილებელია სახელმწიფო უშიშროების, საზოგადოებრივი წესრიგის, მოსახლეობის ჯანმრთელობის, საქართველოს მოქალაქეთა და სხვა პირთა უფლებებისა და კანონიერი ინტერესების დაცვის უზრუნველსაყოფად.

მუხლი 19. უცხოელთა დაბეგვრა

უცხოელები საქართველოში იბეგრებიან ბეგარით და მოსაკრებლებით თანაბრად საქართველოს მოქალაქეებისა, თუ საქართველოს კანონმდებლობით და საერთაშორისო ხელშეკრულებებით სხვა რამ არ არის გათვალისწინებული.

მუხლი 20. უცხოელთა უფლებების დაცვა

1. უცხოელებს საქართველოში უფლება აქვთ მიმართონ სასამართლოს და სხვა სახელმწიფო ორგანოებს თავიანთი ქონებრივი, პირადი არაქონებრივი და სხვა უფლებების დასაცავად.

2. უცხოელები საქართველოს მოქალაქეების თანაბრად სარგებლობენ საპროცესო უფლებებით.

3. ყოველ უცხოელ მოქალაქეს და საქართველოში დროებით მყოფ მოქალაქეობის არმქონე პირს უფლება აქვს ნებისმიერ დროს მიმართოს იმ სახელმწიფოს დიპლომატიურ ან საკონსულო წარმომადგენლობას, რომლის მოქალაქეობაც მას აქვს ან რომელშიც მუდმივად ცხოვრობს, ხოლო თუ ასეთი რამ არ არსებობს – იმ სახელმწიფოს დიპლომატიურ ან საკონსულო წარმომადგენლობას, რომელიც უფლებამოსილია დაიცვას იმ სახელმწიფოს მოქალაქეთა ინტერესები, რომლის მოქალაქეც არის უცხოელი ან რომელშიც მუდმივად ცხოვრობს მოქალაქეობის არმქონე პირი.

მუხლი 21. დამოკიდებულება საარჩევნო უფლებისადმი

უცხოელებს საქართველოში არა აქვთ უფლება აირჩიონ ან იყვნენ არჩეულნი საქართველოს პარლამენტში და სხვა არჩევით სახელმწიფო ორგანოებში. ასევე მათ არ შეუძლიათ საერთო სახალხო კენჭისყრაში (რეფერენდუმში) მონაწილეობა.

მუხლი 22. დამოკიდებულება სამხედრო სამსახურისადმი

1. უცხოელი მოქალაქეების და საქართველოში დროებით მყოფი მოქალაქეობის არმქონე პირები ვალდებული არ არიან იმსახურონ საქართველოს შეიარაღებულ ძალებში.

2. საქართველოში მუდმივად მცხოვრები მოქალაქეობის არმქონე პირნი საქართველოს კანონმდებლობით დადგენილი წესით მიიჩნევიან სამხედრო ვალდებულად.

თავი III

საქართველოში უცხოელთა შემოსვლა და გასვლა

მუხლი 23. საქართველოში შემოსვლა

1. საქართველოში შემოსვლისათვის უცხოელებმა საქართველოში შემოსასვლელი ვიზის მისაღებად განცხადებით უნდა მიმართონ საზღვარგარეთ არსებულ საქართველოს დიპლომატიურ წარმომადგენლობას ან საკონსულო დაწესებულებას, ან საქართველოს საგარეო საქმეთა სამინისტროს შესაბამის ქვედანაყოფს, წარმოადგინონ საზღვარგარეთის მოქმედი პასპორტი ან თავიანთი მუდმივაცხოვრებელი ქვეყნის შესაბამისი ორგანოს მიერ გაცემული პირადობის დამადასტურებელი მოქმედი სამგზავრო დოკუმენტი.

2. საქართველოს საერთაშორისო ხელშეკრულებებით და საკანონმდებლო აქტებით გათვალისწინებულ შემთხვევებში უცხოელი მოქალაქეებისა და მოქალაქეობის არმქონე პირთა შემოსვლა საქართველოში შეიძლება უვიზოდაც.

3. საქართველოში შემოსვლა უცხოელ მოქალაქეს ან მოქალაქეობის არმქონე პირს შეიძლება აეკრძალოს:

- ა) თუ ჩადენილი აქვს დანაშაული მშვიდობისა და კაცობრიობის წინააღმდეგ;
- ბ) თუ უკანასკნელი 5 წლის განმავლობაში ჩადენილი აქვს მძიმე სისხლის სამართლის დანაშაული;
- გ) სახელმწიფო უშიშროების უზრუნველყოფის ან საზოგადოებრივი წესრიგის დაცვის ინტერესების თვალსაზრისით;
- დ) თუ ეს აუცილებელია საქართველოს მოქალაქეთა და სხვა პირთა უფლებებისა და კანონიერი ინტერესების დასაცავად;
- ე) მხილებულია საქართველოს წინააღმდეგ მიმართულ მოქმედებაში;
- ვ) მოსახლეობის ჯანმრთელობის დაცვის ინტერესების თვალსაზრისით;
- ზ) თუ საქართველოში წინანდელი ყოფნის დროს დაარღვია ამ კანონისა და საქართველოს სხვა კანონთა მოთხოვნები;
- თ) თუ საქართველოში შემოსვლაზე შუამდგომლობის აღძვრისას წარადგინა ყალბი ცნობები;
- ი) საქართველოს კანონმდებლობით გათვალისწინებულ სხვა შემთხვევებში.

საქართველოს 1997 წლის 28 ოქტომბრის კანონი №9 95 - I ს-პარლამენტის უწყებანი, №4 5, 2 1.11.1997წ., გვ. 23

საქართველოს 2005 წლის 2 ივნისის კანონი №1493-III - სსმ I, №28, 14.06.2005 წ., მუხ.180



მუხლი 24. საქართველოდან გასვლა

1. უცხოელებმა საქართველოდან გასვლისას უნდა წარმოადგინონ საზღვარგარეთის მოქმედი პასპორტი ან თავიანთი მუდმივსაცხოვრებელი ქვეყნის შესაბამისი ორგანოს მიერ გაცემული პირადობის დამადასტურებელი მოქმედი სამგზავრო დოკუმენტი და შესაბამისი ვიზა აგრეთვე მიგრანტის ბარათი.

2. საქართველოში მუდმივად მცხოვრებმა უცხოელებმა საქართველოდან გასვლისას შესაბამის ორგანოებში უნდა წარადგინონ საზღვარგარეთის მოქმედი პასპორტი ან თავიანთი მუდმივსაცხოვრებელი ქვეყნის შესაბამისი ორგანოს მიერ გაცემული პირადობის დამადასტურებელი მოქმედი სამგზავრო დოკუმენტი და საქართველოდან გასვლის ვიზა აგრეთვე მიგრანტის ბარათი. (ძალადაკარგულია) [საქართველოს საკონსტიტუციო სასამართლოს პირველი კოლეგიის 2004 წლის 3 აგვისტოს გადაწყვეტილება №1/4/212,-სსმIV, №36, 06.08.2004წ., გვ.9]

3. უცხოელ მოქალაქეს და მოქალაქეობის არმქონე პირს საქართველოდან გასვლა ეკრძალება:

ა) თუ მისი გასვლა ეწინააღმდეგება სახელმწიფო უშიშროების უზრუნველყოფის ინტერესებს – ამ გარემოებათა მოქმედების შეწყვეტამდე;

ბ) თუ იგი ეჭვმიტანილია ან ბრალდებულია დანაშაულის ჩადენაში, – მის მიმართ საქმის წარმოების შეწყვეტამდე;

გ) თუ გასამართლებულია დანაშაულისათვის – სასჯელის მოხდამდე ან სასჯელისგან განთავისუფლებამდე;

დ) საქართველოს კანონმდებლობით გათვალისწინებულ სხვა შემთხვევებში.

4. შეიძლება უცხოელი მოქალაქის და მოქალაქეობის არმქონე პირის საქართველოდან გასვლის გადავადება, სანამ მოიხდის სამოქალაქო-სამართლებრივ ვალდებულებებს.

საქართველოს 1997 წლის 28 ოქტომბრის კანონი №995 - I ს-პარლამენტის უწყებანი, №45, 21.11.1997წ., გვ. 23

საქართველოს 1998 წლის 26 ივნისის კანონი №1482-III-პარლამენტის უწყებანი, №25-26, 15.07.1998წ., გვ.27

საქართველოს საკონსტიტუციო სასამართლოს პირველი კოლეგიის 2004 წლის 3 აგვისტოს გადაწყვეტილება №1/4/212,-სსმIV, №36, 06.08.2004წ., გვ.9

მუხლი 25. სასაზღვრო და მიგრაციული კონტროლის ორგანოები მიერ მისი საზღვრის გადაკვეთაზე უარის თქმა

1. საქართველოს სასაზღვრო და მიგრაციული კონტროლის ორგანოებმა შეიძლება უცხოელებს უარი უთხრას საქართველოს საზღვრის გადაკვეთაზე, თუ ისინი არ წარადგენენ სათანადო წესით გაფორმებულ მოქმედ უცხოეთის პასპორტებსა და სხვა საჭირო დოკუმენტებს.

2. ამ კანონის 24-ე მუხლის მე-2 ნაწილით და საქართველოს სხვა საკანონმდებლო აქტებით გათვალისწინებულ შემთხვევებში საქართველოს სასაზღვრო და მიგრაციული კონტროლის ორგანოებს შეუძლია საზღვრის გადაკვეთისას დააკავოს უცხოელი და გადასცეს საქართველოს სამართალდამცავ ორგანოებს.

საქართველოს 1998 წლის 26 ივნისის კანონი №1482-III-პარლამენტის უწყებანი, №25-26, 15.07.1998წ., გვ.27

მუხლი 26. საქართველოდან გასვლაზე უარის გასაჩივრება

უცხოელებს საქართველოდან გასვლაზე უარი შეუძლიათ გაასაჩივრონ 10 დღის ვადაში სასამართლო წესით.

მუხლი 27. ტრანზიტით გავლა

1. უცხოელებს საქართველოს ტერიტორიის ტრანზიტით გავლა შეუძლიათ ამ კანონის 23-ე მუხლში მითითებული ორგანოების მიერ გაცემული სატრანზიტო ვიზის საფუძველზე.

2. საქართველოს სასაზღვრო ზონის ტრანზიტით გავლის წესი განისაზღვრება საქართველოს პრეზიდენტის ბრძანებულებით.

საქართველოს 1997 წლის 16 ოქტომბრის კანონი №928- I ს-პარლამენტის უწყებანი, №44, 11.11.1997წ., გვ.15

საქართველოს 1997 წლის 28 ოქტომბრის კანონი №995 - I ს-პარლამენტის უწყებანი, №45, 21.11.1997წ., გვ. 23

თავი IV უცხოელთა პასუხისმგებლობა

მუხლი 28. სამართალდარღვევისთვის პასუხისმგებლობის საფუძველები

უცხოელებს, რომლებმაც საქართველოს ტერიტორიაზე ჩაიდინეს დანაშაული, ადმინისტრაციული ან სხვა სახის სამართალდარღვევა, პასუხისმგებლობა ეკისრებათ საქართველოს კანონმდებლობის შესაბამისად, თუ საქართველოს საერთაშორისო ხელშეკრულებებით სხვა რამ არ არის გათვალისწინებული.

მუხლი 29. საქართველოდან გამეცემა

1. უცხოელი მოქალაქეები, აგრეთვე საქართველოში დროებით მყოფი მოქალაქეობის არმქონე პირები საქართველოდან შეიძლება გამეცდნენ:

ა) თუ აღარ არსებობს საქართველოში მათი შემდგომი ყოფნის საფუძველი;

ბ) თუ ისინი უკანონოდ შემოვიდნენ ან იმყოფებიან საქართველოს ტერიტორიაზე;

გ) თუ მათი ყოფნა საქართველოში ეწინააღმდეგება სახელმწიფო უშიშროების ინტერესებს და



საზოგადოებრივი წესრიგის დაცვას;

დ) თუ ეს აუცილებელია საქართველოს მოქალაქეების და საქართველოში მყოფ პირთა ჯანმრთელობის, უფლებებისა და კანონიერი ინტერესების დაცვისათვის;

ე) თუ ისინი განზრახ სისტემატურად არღვევენ საქართველოს მოქმედ კანონმდებლობას;

ვ) საქართველოს კანონმდებლობით გათვალისწინებულ სხვა შემთხვევებში.

2. უცხოელი მოქალაქეების, აგრეთვე საქართველოში დროებით მყოფი მოქალაქეობის არმქონე პირების საქართველოდან გაძევების გადაწყვეტილება მიიღება საქართველოს პრეზიდენტის ბრძანებულებით განსაზღვრული გაძევების წესის შესაბამისად.

3. უცხოელი მოქალაქეები და საქართველოში დროებით მყოფი მოქალაქეობის არმქონე პირები ვალდებული არიან გაძევების შესახებ გადაწყვეტილების მათთვის გასაგებ ენაზე წარდგენის შემდეგ გადაწყვეტილებაში მითითებულ ვადაში დატოვონ საქართველო. თუ აღნიშნული პირები უარს იტყვიან საქართველოდან გასვლაზე ან გადაწყვეტილებაში მითითებულ ვადაში არასაპატიო მიზეზით არ გავლენ საქართველოდან, ისინი იძულებით გაძევდებიან და გაძევებიდან ერთი წლის განმავლობაში მათზე არ გაიცემა საქართველოში შემოსასვლელი ვიზა და მიგრანტის ბარათი.

4. გადაწყვეტილება საქართველოდან უცხოელთა გაძევების თაობაზე შეიძლება გასაჩივრდეს სასამართლო წესით.

საქართველოს 1997 წლის 16 ოქტომბრის კანონი №928- I ს-პარლამენტის უწყებანი, №44, 11.11.1997წ., გვ.15

საქართველოს 1997 წლის 28 ოქტომბრის კანონი №9 95 - I ს-პარლამენტის უწყებანი, №4 5, 21.11.1997წ., გვ. 23

საქართველოს 1998 წლის 26 ივნისის კანონი №1482-III-პარლამენტის უწყებანი, №25-26, 15.07.1998წ., გვ.27

მუხლი 30. პასუხისმგებლობა საქართველოს ტერიტორიაზე სატრანზიტო გავლის წესების დარღვევისათვის

უცხოელებს საქართველოს ტერიტორიაზე სატრანზიტო გავლის წესების დარღვევისათვის ეკისრებათ საქართველოს კანონმდებლობით გათვალისწინებული პასუხისმგებლობა.

მუხლი 31. საქართველოში მუდმივად მცხოვრებ მოქალაქეობის არმქონე პირთა პასუხისმგებლობა

არ შეიძლება საქართველოდან საქართველოში მუდმივად მცხოვრები მოქალაქეობის არმქონე პირთა გაძევება. ამ შემთხვევაში გამოიყენება საქართველოს კანონმდებლობით გათვალისწინებული პასუხისმგებლობის სხვა ღონისძიებანი.

თავი V დასკვნითი დებულებები

მუხლი 32. უცხოეთის სახელმწიფოთა წარმომადგენლობების მეთაურთა და თანამშრომელთა, აგრეთვე სხვა პირთა პრივილეგიები და იმუნიტეტი

ამ კანონის დებულებები არ ვრცელდება უცხოეთის დიპლომატიურ და საკონსულო წარმომადგენლობათა მეთაურებსა და თანამშრომლებზე, აგრეთვე იმ პირებზე, რომლებიც საქართველოს კანონმდებლობისა და საქართველოს საერთაშორისო ხელშეკრულებების შესაბამისად სარგებლობენ პრივილეგიებითა და იმუნიტეტით.

მუხლი 32¹. უცხოელის საქართველოდან გასვლის ზოგადი მოთხოვნა

თუ 2006 წლის 1 ივნისამდე უცხოელი საქართველოს ტერიტორიას დატოვებს მისი კანონიერად ყოფნის ვადის ამოწურვიდან 10 დღის განმავლობაში, მას არ დაეკისრება ადმინისტრაციული პასუხისმგებლობა ჯარიმის სახით.

საქართველოს 2005 წლის 28 დეკემბრის კანონი №2631-რს- სსმ I, №3, 16.01.2006წ., მუხ.25

მუხლი 33. საერთაშორისო ხელშეკრულებათა გამოყენება

თუ საქართველოს საერთაშორისო ხელშეკრულებებით დადგენილია ამ კანონში გათვალისწინებული წესებისაგან განსხვავებული წესები, გამოიყენება საქართველოს საერთაშორისო ხელშეკრულებებით დადგენილი ნორმები.

საქართველოს პარლამენტის თავმჯდომარე – სახელმწიფოს მეთაური **ედუარდ შევარდნაძე**

საქართველოს პარლამენტის სპიკერი **ვახტანგ გოგუაძე**

თბილისი.

1993 წლის 3 ივნისი.

შეტანილი ცვლილებები:

1. საქართველოს 1997 წლის 16 ოქტომბრის კანონი №928- II ს-პარლამენტის უწყებანი, №44, 11.11.1997წ., გვ.15

2. საქართველოს 1997 წლის 28 ოქტომბრის კანონი №9 95- II ს-პარლამენტის უწყებანი, №4 5, 21.11.1997წ., გვ.

23

3. საქართველოს 1998 წლის 26 ივნისის კანონი №1482-I II ს-პარლამენტის უწყებანი, №25-26, 15.07.1998წ., გვ.



4. საქართველოს 2004 წლის 24 ივნისის კანონი № 189 - რს - სსმ I, № 19, 15.07.2004 წ., მუხ. 73
5. საქართველოს საკონსტიტუციო სასამართლოს პირველი კოლეგიის 2004 წლის 3 აგვისტოს გადაწყვეტილება №1/4/212,-სსმIV, №36, 06.08.2004წ., გვ.9
6. საქართველოს 2005 წლის 2 ივნისის კანონი № 1493 - ის - სსმ I, № 28, 14.06.2005 წ., მუხ. 180
7. **ძალადაკარგულია** - საქართველოს 2005 წლის 27 დეკემბრის კანონი № 2535 -რს - სსმ I, № 3, 16.01.2006 წ., მუხ. 16 (ამოქმედდეს 2006 წლის 1 ივნისიდან).
8. საქართველოს 2005 წლის 28 დეკემბრის კანონი № 2631-რს - სსმ I, № 3, 16.01.2006 წ., მუხ.25

